

Pitani Luhuva Nampa 1

Nónohá kimike lo kimi gakó

1 ¹Neza Pitana Izesu Kilistoni aposolo noutímina, Ómasímo kelémo etó i vejená lekeza Zelusalegatí hutilí iake Potu itó Galesia itó Kapatasia itó Asia itó Pitinia mikasiuka viki gá nia vejená luhuva imane gizo nolukumuve. ²Lekeza nene Sikalahulímo lekelémo apazá zekiko Izesu Kilistoni gakó gili alitave loko itó aí golani hololeketamó nenémo likigika nagamá zekiko minatave loko Ómasi ametipo lo molonoitó minakutí lekelémo etó imóma neve.

Ómasilokatí nasahilí itó hulu lekelitoka minoloko iteko minino.

Okulumakú alévolé henonimú lagata losi gelemoko ageva oaká nune

³Leza Guivahanite Izesu Kilistoni amelaho Ómasi agepoka litunize. Áisi nene Izesu Kilistoni nene heleneikutí alémo otekamole loko agika napa oko hizelimikago gosohá lemetameni limigo Ómasilokatí utó okunike netá lamaná alitune loko lagata losi gelemoko ageva oaká minokoko voko minoakalímini gihiláa geleko minoaká nune. ⁴Itó heleneikutí alémo otekamole loko okulumakú helisa henonite hulupa legeko lá amoakalímini itó anuva oko gelesamoakalímini itó helemoakalímini ageva nounimó nene miniki okulumakú alitave loko ale vavá oletamó. ⁵Lá oake, Ómasímo aí zámuzalatumú gizapa noleketiko aikumú gili alévolé iki niko minoko gamena asú noiko lukugutó vizeaká netá lehizeleketanogo noimó nene utó oko lamaná inogo ive.

⁶Lá itikumú lokogoliza viziki niminamóza, Ómasímo giliko etokikoma, gamena alínipáisi gopogunímini amupiló itiki miluma giliki miniki gopa lokogoliza viziiki minatave loko noluve. ⁷Gilinahe. Goli gehani minoko lapuluva oaká netalímini pipizá netá gopa netimoláa nene lolímo lo asú okiko goli gehanigó etó oko minanogo ive. Ámináminoko gele alévolé oaká netatinímini meinava goli avilegeko iteko minamóza, gopoguni mililikitata netalímo alémo mómoká noikoma, gele alévolé oakatini kii loko noiko, Izesu Kilistó anititi gamenaló nene lukugulizá ali otiki lekegepoka niliko gonanaliváa lekelitoka utó inogo ive. ⁸Lekeza Izesuni

ametamenía ánígamatita gopa likigikatini amiaká niave. Lá niake itína gamena nene lokogómulatunú aí ánígamake aikumú gopa nene gili alévolé iaká niave. Lá niake lokogoliza viziki lagaváa haitolímini vegealita legepatunú lo utó moloko lamoakalímini nene giliaká niave. ⁹Ómasimú gele alévolé oakatinímini gihiláa nene likigikatini lukugutó vizeaká netá nene omo lokovogisaloka okaze, nenemú lokogoliza nivizeve.

¹⁰Ámina lugutó vizeaká netá nene Ómasímini agepagutí gako liaká a ve keza nana okoko utó itimó neve liki gozapá vitagá iki nenémini mogonamú agizaka hiziki minamó neve. Lá iake lekelitoka Ómasímini nasahilí utó itive liki alikamú gako li miliake minamó. ¹¹Kilistó eza miluma gelekoko alika lapanalagi gonanalisi alitikumú Kilistoni Sikalahulámo gako nene kigikagú molokago keza gamena nanahé zupa itó nana gamenaló Kilistotoka utó o amitive liake nenémini mogonamú vitagá iki minamó. ¹²Keza hoza alemó nene kezáikumule loko nomive. Ómasímo lekelitoka utó itive loko lo utó oko lo kimimóma neve. Itó alika nenémini gihila utó okago Ómasímini Sikalahú amiselekago, eza okulumakutí lemeake zámuza lehizekimikago Izesuni gako lamaná li hutilí a vete li lekemego gilinamóma neve. Ámina gako nekisáa nene ageló keza gele guni itupe liki gili miniaká niave.

Etó oko minoko aleko ituni gako

¹³Nenemú lekeza likigika lakagatatinímini nagá zi gikitiki niminiki gizapa etoha iki Izesu Kilistó goha utó oko nasahilí oleketatikumú lakagata losi gelemiki ageva iki minalo. ¹⁴Lekeza gozapá numuká vegeaná minake gatizá minago lukugupémo amu heleaká netá aliki minamó. Itínasa nene ámina netató iki miliki amiki Ómasi gili amilo. ¹⁵Sele lo likimi ve Ómasi eza apazá keké vizeko noitíminiki iki miliki niiki apazá keké vizikigó minalo. ¹⁶^a Nenemú Ómasímo li gako makó nene monó gotolaú láa liki luhuva gizinamóma neve:

Neza apazá keké vizeko nounazo, lekeza ámina iki apazá keké viziki minalo.

¹⁷Lekeza ametehove liki limiake Ómasiloka liaká niave. Eza voko aleko oko aleko itigopa, minoko aleko oko moloko ituni avotigila oko hee loko gona mololetanogo ive. Nenemú lekeza mikasiuka gá ve minata gamenaló nene lekehelele viziko minalo. ¹⁸Lekeza láa liki gili minalo: Lekeza avotike netá gihila nomi gapoló nivago netá hutuváamo goli silivá nenéminímo meinavatini hizeko gologí oleketonamimóma neve. ¹⁹Lekeza Kilistoni golani meinava iteko minamó nenetunú meina hizeko gologí oleketonoimóma neve. Eza guguni gizoaká sipsip iza agupe gololó

^a 1:16 Liv 11:44-45, 19:2

imó itó avasavagi vové avé loko minamó nenéminoko minamóma neve.
²⁰Itó gozapá mikasi ale utó ami gamenaló nene Ómasímo hoza gakó lomikago utó i ve nenémo alikama gamena asú inogo noigo lekelikumule loko utó imóma neve. ²¹Lá oake, Ómasiloka lekelémo apizekago lekeza heleneikutí alémo oteake gonanalivagi lapaná ale luhota vemú gili alévolé iake gele alévolé oakatini itó lakagata losi gelemiki ageva iakatini nene Ómasilokagó neve.

²²Lekeza gakó gihila gili aliaká niago, lekelí likigikatini mokoná lamómave loko likigivetikini nene soza netá alikitamiki lamanakutí likigika kimiaká niave. Nenemule liki likigika lamanakutí eza amiko eza amiko iki múnahiki minalo. ²³Lekeza gosohá utó amó nene avotike hiliaká amómámini zuhaváa negopa, alévolé ve Ómasilokatí utó amóma neve. Alévolé lemetameni ale utó oko alévolé oko minoaká gakokutí Ómasímini gakokutí utó amóma neve. ²⁴^b Nenémini gakó makó nene monó gotolaú láa loko nemóma neve:

Vegená mukitó nene gihisi nenéminiki niave.

Itó ániagi laga hiliaká netáini nenémo netá guvava lamaná nenéminoko neve.

Gihisi nene gulu gulu vizeaká noive.

Itó guvaváa nenémo lutehemó zeaká noimóza,

²⁵Guivahanímini gakó nene alévolé oko mino lúaló moloko minoakalímini neve.

Ámina gakó lamaná li likimikago gilinamóma neve.

Guivahanímo alévolé oko minoaká gehani noigo aí apazá vegená nounge

2 ¹Lekeza hokolizá soza netá itó genezatini losi minoaká itó kemekugú noaká itó aleko letoaká nene ahuli asú ilo. ²Ahuli asú iiki izegipa namuni keza aminikumú kiviseaká noimó nenéminiki likigikatinímini aminí lamanakumú likivisino. Ámina aminí lamaná niliki viki monokú napa iiki gehatiki minataze. ³^c Guivahanímini nasahililamú makó lagaváa gilinita vegenalita némini itaze.

⁴Lekeza Guivahani minoloko voko minoaká gehanigitana noi ve vegenalite ániagi ahulamóza Ómasímo giligo meinaváa iteko mina ve alémo etó i veloka viki gímizilo. ⁵Lá niiki sikalahutinigi gehani lilí i asú iiki miní amiki miniliki itiki Ómasímini Sikalahulímini monó numuni lilí ilo. Lá iiki nene apazá guguni gizi amiaká vegená niiki Ómasiloka liakatunú guguni gizi amikiko Izesu Kilistotoka vokiko, gelekoko gele laga itize. ⁶^d Izesukumú monó gotolaú gakó láa loko nemóma neve:

Neza alévolé gehani makó meinava iteko minamó nene alémo etó okuke

^b 1:24-25 Isa 40:6-8 ^c 2:3 Age 34:8 ^d 2:6 Isa 28:16

Zaion agokaloka geha lapusa nohizuve.

Aikumú gili alévolé itamó nenete viki netá alemamómave liki mulúikú ma mesaha aminogo ive.

^{7e} Lekeza aikumú gili alévolé iaká nia vegeatoka nene eza netá meinava iteko minoaká noive. Itó gili alévolé ama vegeanakumú nene monokú láa loko lonoimóma neve:

Numuni giaká ve keza gehani makó ánihi goselé iake ali ahulamó nenémo geha lapusa loló oake noive.

^{8f} Itó aikumú monokú luhuva makó láa liki gizinamóma neve:

Ámina gehani amupilotí lotohá kipilinoivo.

Itó ámina gehanilotí kepele molanogo ive.

Loko limó nene monó ahulakumú lotohá kipilitive loko lonoitó viki nenémimi iaká niave.

^{9g} Lá onoimóza, lekeza nene lekelémo etó onoi vejená itó agulizaki ve napatémimi guguni gizi amiaká nia vejená itó Ómasímimi apazá keké viziki nia vejenala lilí ake aí zuha lilí iki niave. Lekeza límugusigutí lekelémo otopá zeake lapanalámimi silikakénaló lekelémo mola vémini gakó li hutilí ikiko hutilí itive loko sele lo likimimóma neve. ^{10h} Lekeza gozapá nene ha netá minamóza itína nene Ómasímimi vejenala zuha lilí iki niave. Gozapá nene gopa minamóza itína nene agika hize likimitímimi agikagú niave.

Ómasímimi gelekelé vejená minatune

¹¹ Nigive nagavese, neza gala vizeko lakagata aleko lo likimitoze, gililo. Lekeza mikasiuka gá niamó itó hanuva veno vejená niatita lukugupémimi laga aviseaká noi netalímo likigika lova ale ameaká netá nene mosilo.

¹² Lá niiki monó gelema vejenalitimí holúikú etó iki minalo. Lá iki niiko, ámina vejenalite mogonataganatimi ánihiiki giliiki golesa netá aliaká nia vejená niave liaká nia gakó nene ahuliiki iki miliki ita mogonatimi lamaná ánihiiki Ómasímo gakó hoza aleketati gamenaló nene Ómasi agepoka liki minataze.

¹³ Vegenalita gizapa ve haitopaitolímimi kilími milamó nene lekeza Guivahanimule liki gelekelé ikitalo. Gamanitimi agulizaki ve napámimi gakola ¹⁴ itó kipepe kéisi li huka gakó gili alilo. Ómasímo golesa netá aliaká nia vejená nene nogosani kimitave loko itó gakóimi giliki netá lamaná aliki miniaká nia vejená kekepoka litave loko gamanite kelémo etó onoimóma neve. ¹⁵ Lekeza lá iki lamaná iki iki miliki itamó nenémo vejená negía keza lekelikumú negi gakó liaká niamó nene kegepaló gahumá ikitatave loko Ómasímo loleketonoimóma neve. ¹⁶ Lekeza mukí

^e 2:7 Age 118:22 ^f 2:8 Isa 8:14-15 ^g 2:9 Gá 19:5-6; Isa 43:20-21; Tae 2:14; Isa 9:2

^h 2:10 Hos 2:23

netalímini nagakutí mota gologí olimikamóma neve liki lamaná iki miniki aliki ilo. Itó lá iki minatamó nenémo golesa netalímini gahumaláa loló amino. Lekeza alévolé iki miniki Ómasímini gelekelé izegipa lilí iki minalo. ¹⁷Lekeza mukí vejená kilími guni ilo. Itó likigive monokú niamoláa likigika kimilo. Ómasimú lekehelele viziko minalo. Gamanitini agulizaki ve napáa nene alími napa ilo.

Kilistó miluma gilike ale goí mololetamó

¹⁸Gelekelé izegipa lekeza gizapa velinitini kamatoka limiki miniki nasahilí ikitiki gakóini gili alilo. Itó huluváa itó kigika lamanaki mina vejenakumukó negopa, ve lolaváa itó gínikaha ve kezagi nenémini ikitalo. ¹⁹Keza galana nomitó hanuvamú miluma hoza alilikitikoma lekeza Ómasimú giliki gínikaha amiki lamaná iki niko, Ómasímo lekelikumú giliko lamaná itize. ²⁰Itó lekeza lihima netá naliko nilikipilikoma, gínikaha amiki niko, ve makolímo geké loleketatihe. Lá aminogo ive. Nenemú lamaná iki miniko likipiliki miluma netá alilikimikikoma legesó iki minalo. Lá itamó nene Ómasímo giliko lamaná inogo ive.

²¹Lekeza nenémini itave loko sele lo likimimóma neve. Kilistó eza ámina oko lekelikumule loko miluma gilike ale goí oko gapo veleleketamóma nenazo, lekeza agizaka hiziki vilo. ²²ⁱ Áisi nene lihima makó ale utó molamimóma neve. Itó agepagutí soza makó lamimóma neve. ²³^j Alivi galativi nitago eza alevo galatovo oko loketamimóma neve. Itó miluma nogilike gamuni oketamike mogonataganamú ale hee loko lo hukoaká ve Ómasiloka leheta oko minamóma neve. ²⁴^k Lelí lihimá aí amupiló itekago, agohí geake, zohota zaló hilimó nene netá golesa aleakakumú hele vejenakitana iki mómoká iki otemitave loko, itó hee loko minoakakumú miniki aliki itave loko lá imóma neve. Itó aí agómuni nenémo likigikámini agómuni gimóma neve. ²⁵^l Lekeza sipsip iza nenéminiki hela hiziki mihina amóma nemóza, itína nene likigikámini gizapa ve nenémo lekelémo atiginá okago aitoka anitikave.

Ve alevetini gakó

3 ¹^m Vená lekeza ámina iki vatinitini kagahisiuka limiki minalo. Itó vatini lugáa nene monokumú gelemake miniaká nitamó nene monokú vi hilatave liki gakó nene li kememiki hanuva likigika lamanaki minikiko ²vatini nene lekelí iki miliki miniki aliki iaká netá nene gizopa lo miniko ániigiiki kigika ali viligiki minataze. ³ⁿ Lekeza lukugupémini gonanaliváa nene nagatumó iki zopovatini ali lamaná iki gonanalisi

ⁱ 2:22 Isa 53:9 ^j 2:23 Isa 53:7 ^k 2:24 Isa 53:5 ^l 2:25 Isa 53:6 ^m 3:1 Epe 5:22;
Kolo 3:18 ⁿ 3:3 1 Tim 2:9

itakumú itó likigisa likigizatoka gonanalisi iki meinava iteko mina netá milatakumú itó ginégane luhuvagi luhatakumú gilikiko ha netá loló ino. ⁴Lá noiko geha itó hulu iki minata netalímo likigikagú vaí o lamaná oko gikí okiko gonanalisitini nene alévolé oko minoakalímuni itó litaha lamoakalímuni Ómasímo gelekiko iteko minati netá likigikagú minative. ⁵Monóinigi vená gozapá miniliki amó keza kigikámuni gonanalisi netá nenémínáa aliki miniki amó. Lá ake Ómasiloka leheta iki váinitini kagahisiuka limiki miniaká amóma neve. ⁶Salá eza ámináminoko vana Avalahani gakola nene gele aleake aikumú guivahaníneve loko lomiaká imó. Itó lekeza netá lamaná lílí iki netá nemú manamú lekelegesá legemiko minatamó nene Salani izegipala zuha niave loko loleketanogo une.

⁷Itó ve lekeza ámina iki venatinigi hamolímuni alévolé lekemetameni ali lá inamóma nenazo, Ómasiloka numuna liki akiki otikitini nenémo voko lí amitive liki venatinigi apiziki miniki zámuzáini lemeko nenaze liki gili miniki venatini nene netá matá nene likigika lamanakutikó li kimiki minalo.

Oko moloko itunitímo vo guni noiko milumámuni amupiló itituni gakó

⁸Lá niiko lo asú oko lo likimitoze. Lekeza mukitoka likigikatini mili hamokó iki geha ziki miniki likigika eza amiko eza amiko iki likigivetikini milumáini giliki lukugupelini aliki limiki minalo. ⁹Netá golesa nalilikitikoma, lekeza ali viligiki netá golesa alikitamilo. Alivi letivi nilikitikoma lekeza ali viligiki aliki letamiki nónohá zikitalo. Lekeza nónohá zeleketatove loko Ómasímo sele lo lekemeneimóma nenazo, lekeza ámina iki lusa gakó nene li kimilo. ¹⁰⁻¹²⁹ Nenemú monó gotolaú gakó makó láa loko neve:

Guivahani eza hee hee liki miniaká nia vegeatokagó agovisa kemeko aitoka liaká niakumú agata moloko gámeme noimóza,
golesa netá aliaká nia vejená nene Guivahanímo ániagamó áni go selé oaká noinazo,
makó keza alévolé oko minoakakumú lagaváa kivisekiko logoliza vizeko minoko aleko itune liikima genezáiniló gizapa iiki gakó golesa lamitaze.
Itó kegepatunú soza gakó makó lamitaze.
Itó golesa netá kemegeza amiiki netá lamanakó alitaze.
Hulugú miniki nenémuni hozaváa aliki amuza miliki alitaze.

° 3:6 Apí 18:12 P 3:7 Epe 5:25; Kolo 3:19 ° 3:10-12 Age 34:12-16

Gopoguni militatamómámini amupiló itituni gakó

¹³Lekeza netá lamanakumú viki gímiziiki niko hí vémo netá golesa loló oleketative. ^{14 r s} Itó lekeza iki miliki itatímo vo guni noiko miluma netalímini amupiló ititamó nene, Ómasímo nenemú gelekiko lokogoliza viziti netá loló inogo ive. Itó lova ali likimiki lekelegesá ligiti gakó nilikoma, likigisa likigizakutí luvoluvo zemino. Itó mulutini itemino. ¹⁵Likigikatini ali guluvítiki ali guni ikiko Kilistó eza Guivahanitini loló o likimino. Lá okiko netá matakumú likigikatunú lakagata losi gelemiki ageva iaká niakumú loká nilikitikoma, vávani oko ámina mogona lo utó moloko lo kimitune liki ali vatí iki minalo. ¹⁶Lá niiki gakó nene legesó iki keikumú giliko lememiko likigikagú gakó nomiko lamaná iki lilo. Lá niko lekelikumú alivi letivi niko, Kilstogegi apiziki lamaná iki iki miliki itamó nenémo ve nenémináa keza soza sazainímini mogonáini utó okiko kovoza napa hilitaze. ¹⁷Ómasímo likipiliki nagá likimitakumú gelekiko lamaná okiko, netá lamaná lilí niko lilí ilikitatamó nenémo itekave lokomú noluve. Itó lekeza lihima alikiko lilí ilikitatamó nenémo lemekave.

¹⁸Kilistó eza ámina oko hee lo mina ve miluma gilike vejená golesa lelikumule loko hilimó. Eza lihimate asú itive loko lelikumú gamena hámakó helekago mota asú okave. Nene Ómasiloka lelémó molanogo loló imó nene agupegi minoakeve loko apilikago hilimó. Itó Sikalahulagi minoakeve loko goha mómoká oko otimó. ¹⁹Oteko minake nene hiliki vamoláa keza sikalahulitinigi nene nagá geisagú niatoka lemeko monó lo kimimó. ^{20 t} Keza gozapá Noá eza sipi napa loló oko noigo Ómasímo agikagú hulu ominatímove loko kigika ali viligatahe loko kegeva oko minoloko noitigo gakoláa gili ahuli ahuli imi itemó. Lá niago, ve vená 8-así nene ámina sipigú itikago, nagamilímo kelémo veletó okago hanuva minamó. ²¹Nenémini helegáa nene monó nagamí holoakalímo lekelémo lamaná oaká noive. Monó nagamilímo lugupémini golotuváa nene nagamí zesá amive. Monó nagamí nohulunike Ómasi eza ligikate nagamí zelimikiko eza gele lamaná ititó minoko aleko itune loko voká loaká noune. Monó nagamí nohuluko Izesu Kilistoni heleneikutí alémo otekamole loko lugutó vizeaká noive. ²²Itó ezáa okulumakú iteko Ómasímini agizani zamagaloka iteake mitó noigo ageló mukí itó vejená iti minamoláa zámuzagi niamoláa keza aí agahaisiuka limiki niave.

Ómasímini agepagú gakotó gele aleko minatune

4 ¹Kilistó agupe miluma gelekamole liki lekeza ámina iki lilí ilitatave liki zámuzá aliki amuzá milalo. Lá niiki makolímohe makolímohe monokumule loko agupe miluma geleká noititímo golesa netá alitikumú

^r 3:14 Mat 5:10 ^s 3:14-15 Isa 8:12-13 ^t 3:20 Apí 6:1-7:24

goha mumuzó amitive loko gele minatize. ²Itó lukugupémo minoko aleko iti gohalaló lukugupémo amu heleaká noi netá alemiki Ómasímo gilitó molató nene gili aliki minalo. ³Amunaloka hetoka vejená keza lagaváa giliake netá matá lá iki aliki minamó neve: Mokoló netá itó golotuva netá nenémini hozaváa lilí iki minake, piá nagamí niki sipaki niake, iza goula nosá negi nagamiki vauva aliki niki lekemeni ziki eza aviligigo eza aviligigo iki, soza ómai netá gupá zi amiki minamó. Ámina netá nene lekezagi goselé lekepelemigo iliki viki niago gamena hána hána vimó neve. Nenemú goha miní amiki lá amilo. ⁴Itó itína nene hetoka vejenalite golesa netalímini agikagú minake nosánetá niki meleetakeni iki kogoliza viziki niago lekeza kezagi apiziki minake ámina netá lilí amago, keza giliake, ininá niake lekélí nene alivi letivi iaká niave. ⁵Lá ikamóza, hele vejená itó logómulaḡi vejená lelí mogonataganamú goní oletatove loko ale vatí oletonoi ve Ómasiloka gakó hoza sipisi alinogo une. ⁶Nenemú helemoláa keza Izesuni gakó lamaná lo utó oko lo kimimó nene hele vejenalitini gapoló nivake kugupetunú lihima alikago Ómasímo keí mogonataganamú goní oketamóza, helegaloka Ómasímini gapoló viki alévolé oko minoakakú miniki aliki itave loko ámina gakó lamaná lo kimimóma neve.

Ómasímini nasahilí legesó oko ale mininake gona molatune

⁷Netá matá mukí asú iti gamena mota alitokave. Nenemú lekeza likigika lukugupe gizapa iki gili koló iki Ómasiloka numuna loakakumú vávani iki minalo. ⁸“ Lá niiki ligika kemeaká nenémo lihima mukí eza ahulotiko eza ahulotiko oaká noimó nenazo, netá mukí kivilegeko mina netá nene likigika eza amiko eza amiko iakakumú amuza milalo. ⁹Lekeza goselé lekepelemiko veno vejená nene eza nasahilí otiko eza nasahilí otiko kilími numutiuka miliki kilími lamaná ilo. ¹⁰Lekeza Ómasímini monolímini zámua haitopaitolímini lehizeleketató nene hoza aliki lekeza mukitoka vo alitive liki Ómasímini nasahilí nene legesó iki ali miniki gona moloaká vejená minalo. ¹¹Itó monó gakó li utó itamó nenete Ómasímini gakola lamaná li utó iki li kimitaze. Itó vejená nasahilí ikitatamó nenete Ómasímo zámua kemekiko nenetunú nasahilí ikitataze. Lekeza némini manámini niiki Ómasímini agulizá vitive liki lá ilo. Izesu Kilistoni zámuzatunú aí luhuva utó itize, nenemú gonanalivagi lapaná itó gizapa olimiaká zámua aitoka minatímo minoloko voko mino lúaló moloko minatize. Lamaná.

Kilistoni vejenala minunikumule liki gopoguni mililitanigave

¹²Nígika lukumu vejenáise, lekelitoka gimilikú moloaká netá agepagi netá utó noimó nene lekeza netá gosohá utó o lemekave liki hukili amilo.

^u 4:8 Ano 10:12

¹³Kilistó miluma gilimó nenémini agikagú miniki mulutikú agila guluma iko minalo. Lá iki miniki aí gonanalivagi lapanala utó o lekemekiko ámina oko mulutikú agila guluma noiko lokogoliza viziki minalo.

¹⁴Lekeza Kilistoni agulizá ali minakumule liki aliki letiki mumusopa nizilikitikoma, gilikiko nene lapanalímini amelaho Ómasímini Sikalahú nene lekelitoka lemeko minatímini mogona lá oko utó okave liki gili minataze. ¹⁵Lekelitokatí ve makolómohe makolómohe goní omikiko nagá numukú miluma gilitimó nene apele heleakakumupe itó guminamupe itó hokolizakumupe itó geligeli oakakumupe itó laskoli minoakakumupe loló amino. ¹⁶Itó helegaloka makó eza Kilistoni vevenala minakumule liki nagá amikikoma nene, nenemú gelekiko avoza helemiko Kilistoni agulizaláa nene ale minoko Ómasi geké lo amitize. ¹⁷Gilinahe. Ómasi eza vevenalitini mogonataganamú gona moloketati gamena mota alitokave. Itó vevenala zuha lelitoka ámina hoza apí oko alinogo ive. Nenemú lelitoka ganatili napa okoko alitimó nenazo, aleloko voko Ómasímini gako lamaná gili ahuliaká nia vevenatoka voko nolutegeko nene, nanámini oketative. ¹⁸Nenemú monó gotolaú gako makó láa loko neve:

Ve lamaná keza lihimáinimú goní ita gamenaló silipa oko kugutó viziko minatamó nenazo,
nenemú monó gili ahuliaká itó golesa netá aliaká nia vevená keza nana itamó neve.

¹⁹Itó nenemú Ómasímo giliko lamaná onoi miluma malumámini amupiló itita vevenalite kelémo utó oaká ve Ómasi eza lokago alévolé oaká vémini agizakú nene kigikáini miliiki lamaná iki iki miliki minataze.

Ómasímini sipsip iza mulusi gizapa oketatune

5 ¹Lekelitoka monó olotiva ve niamó nene ámina oko monó olotiva ve noutímina gako lo lekemekugo, gilitaze. Neza Kilistó miluma maluma gilimó nene nogómulatunú lamaná ánigutímina noluve. Itó minoko gonanalivagi lapaná utó oloko voko utó noiko nene, izá moloko alito ve neza lakagata aleko gako imane lo nolukumuze, gililo. ²^v Ómasímini sipsip iza mulusi lekeza gizapa ikitatave loko loleketonoimó nene alévolekutikopa, mulutikú lamaná ominiko gizapa lamaná ikitalo. Lá niiki moni henokanoni aleakakumú giliki negopa, ámina hozamú mulutikú ahuu ahuu lokiko iki miliki itaze. ³Lá niiki ve napáini lilí iki lá amilo. Sipsip izatini ali goí ikitiki monokú nene likigizaka hiziki vitave liki kilími zou liki kilímiki vilo. ⁴Itó minoko gizapa ve napa nenémo aniteko gonanalivagi akilí alévolé oko minoakalímini hitolikimikiko, hitiki minataze.

^v 5:2 Zon 21:15-17

^{5w} Gosohá ve lekeza ámina iki olopa vetini kagahisiuka limiki minatave loko lo nolukumuve. Lá niiki lekeza mukitoka lukugupe aliki limiki minata netalímo hoza aleaká gineganetini loló okiko ali akaliki eza gelekelé otiko eza gelekelé otiko iki minalo. Nenemú monó gotoláu gakó makó láa loko neve:

Ómasi eza kugupenini aliki itiaká nia vegenalitini lukesa akeleaká noive. Itó kugupe aliki limiki mina vegená nene hize lé oketake nasahilí okimiaká noive.

^{6x} Nenemú Ómasímini alévolé gizapaló lukugupe aliki limiki gupá zi amilo. Lá ikiko, eza mola gamenaváa alitokiko áisigó lukugulizá ale otinogo ive. ⁷Ómasímo nene vatí oko gizapa oko lekelémo guni oaká noive, nenemú lekeza netá matá gena netá lakagata gululusi giliaká nia netá mukitoka nene aí agizakú milalo.

⁸Lekeza lakagata gili koló iki gizapa iki minalo. Gala velini Satá eza akohú galagitana oko agepa á oaká noi ve eza aí akohitohe aí akohitohe loko agepa á oloko vogá ogá oaká noive. ⁹Nenemú lekeza gili alévolé i miniki vasá zilo. Lá niiki likigive lakagave monokú niamó numutó namató niamoláa keza miluma maluma ámina iki giliki miniaká niave liki gililo.

¹⁰Itó Ómasi nasahilí amelaho eza Kilstotoka gímizemómave loko gonanalivagi lapaná alévolé oko minoakalíminiloka vi hilatave loko sele lo likimi ve áisi miluma maluma gamena alínipáisi nígiliko, lekelémo vevesati zámuza lekemekoko lekelémo kii loko lukesavatini hize kii loleketanogo ive. ¹¹Nenémíni zámuza nene aitokagó minamó nene minoko minoloko voko mino lúaló moloko minino. Lamaná.

Vegená makó gekéini loketamó

^{12y} Neza gakó imane Sailasini nene lo ame ame nougo luhuva gizo nolikimive. Neza aikumú gulugo, nigivéneho gihila loló onoive. Neza Ómasímini nasahililamú gihila noive liki gilitave loko gakó ahaváisi lo utó moloko lo lukumuke hize lé oleketatove loko lo nolukumuve. Ámina nasahilílmíni agikagú alévolé iki oti minalo.

^{13z} Papelonia numutokatí Ómasímini vegenala zuha lezagi lelémo etó i vegená keza getetini nililikitago noluve. Itó monokú alémo mulu ve Makí ezagi getetini nololeketave. ¹⁴Lekeza monokú apizi lamaná iki eza aputá viziko eza aputá viziko iki minalo.

Kilstotoka gímiziki nia vegenalita Ómasímini hulu lekelitoka mino moloko minino.

^w 5:5 Ano 3:34 ^x 5:6 Mat 23:12; Luk 14:11; 18:14 ^y 5:12 Apo 15:22,40

^z 5:13 Apo 12:12, 13:13